


B. N. C.
FIRENZE

1105

7



1105 7



1105.7

E

N2/S4

P5 of 116 XXXX



1105. 7

CI
MARCI PEZZII

VERONENSIS PRÆBYTERI

I N

ECCLESIASTICUM ORATOREM

NOVISSIMARUM ANIMADVERSIONUM

LIBRI DUO.



VERONÆ, MDCCLXIII.

APUD AUGUSTINUM CARATTONIUM;
SUPERIORUM PERMISSU



1105.7

3
EMINENTISSIMO, AC REVERENDISS.

PRINCIPI

CAROLO CARDINALI REZZONICO

S. R. E. CAMERARIO,

INSIGNIS MONASTERII ET ABBATIÆ S. ZENONIS

M. VERONÆ PERPETUO COMENDAT.

ABBATI, COMITI ETC.

MARCUS PEZZIUS.



Amdiu est, EMINENTISS. AC
REVERENDISS. PRINCEPS, cum
has in Ecclesiasticum Oratorem, novif-
simasque Animadversiones mente volve-
bam, id unum veritus, ne si in lucem pro-

A 2

dirent, .

dirent, ab iis, qui in doctrinis maxime versati sunt, studiose minus acciperentur; illisque præsertim Oratoribus, quibus neque ætate, neque ingenio, neque scientia comparari minime audeam. Verum sicuti in optimis quibusque artibus quædam paullatim subrepere contigit, quæ præcipuis illarum regulis maxime adversentur, atque communi hominum bono; haud equidem latere quemquam potest, quod & liberalissimæ Eloquentiæ facultati, nec idem in dicendo Græciæ Oratoribus habitus semper honos, qui Demosthenis ævo, nec idem Romæ sapientibus, qui aurea Tullii ætate, nec idem denique Italicæ linguæ cultus, qui a duobus jam sæculis in præclarissimis Viris tantopere floruit; idemque plane de Ecclesiasticis Oratoribus dicendum nobis sit, qui omni ætate hucusque fuere, tanto licet plausu excipiantur eorum aliquando conciones: valde enim & multitudinis
in-

Intelligentiæ, & animorum commotioni
 officiant nonnulla, quæ admonenda hic
 colligimus, quæque ipsi Ecclesiæ Concio-
 natores castiganda minime advertunt,
 non Rhetoricæ artis inscitia, sed ne vel
 Auditorum voluptati, vel temporis con-
 suetudini displicere illis obveniat. Illud
 tamen suscepti operis consilium nobis esse
 nemo sit qui putet, vetera quidem Rhe-
 toricorum præcepta tradendi, Empedo-
 clis scilicet, Gorgiæ, Aristotelis, Tullii,
 Quintiliani, Sanctorumque Ecclesiæ Pa-
 trum, ut Dei Verbi Ministri æqua insti-
 tuantur divinæ eloquentiæ palæstra; sed ea
 solummodo, quibus, ut in Deliberativo,
 de quo nunc agimus tantum loquendi ge-
 nere, quod & Concionale vocat Aristo-
 teles, in eoque præ cæteris hortando,
 vel dehortando, gravissimis fere de rebus
 consulendum venit; ad Antiquorum in-
 stitutum revocentur potius, ac præstan-
 tissimas naturæ leges, vel ab ipso om-

nium eloquentissimo Viro Divo Chry-
 stomo optimè usurpatas, qui omnem Græ-
 corum, ac Romæ quoque Oratorum ar-
 tem, atque rationem profecutus diligen-
 tissime fuit; quasque & Muratorius ipse,
 vir quidem nostri ævi omnis Literaturæ ex-
 pertissimus, summis extulit laudibus, per-
 petuoque servandas esse commendavit.
 Quare, ut olim Tullius, in his omnibus
 nova dicere intelligo, cum pervetera
 dixerō, quamvis pro ætatis nostræ con-
 suetudine, hominumque judicio, veluti
 inaudita habeantur. Quæ autem sunt i-
 sta? ea utique, quæ in hoc primo adver-
 timus libro, naturali scilicet ingenio, po-
 pularique facundia illa tractanda esse,
 quæ ad humanos mores, vitia, atque vir-
 tutes pertinent, quod pauci admodum fa-
 ciunt; in altero autem quomodo in Ora-
 toris mente conciones meliori, ac expe-
 ditiori via comparari possint, quam re-
 moto alio, ac difficili, quo utuntur fere
 cona-

conatu . Ea ergo tui perhonorifico Nomi-
 ni , EMINENTISS. , AC REVERENDISS. PRIN-
 CEPS , qui primum es mihi , ac nobilissi-
 mus omnium Meccenas , nuncupari liceat ,
 atque ex Veronensi regione , ad hanc us-
 que transmittere omnium inclytam , ac flo-
 rentissimam Urbem . Fausa hæc quidem
 præ omnibus , atque honorificentissima
 Venetorum ætas REZZONICORUM , tam
 amplis a Deo aucta , magnificisque Mu-
 neribus , qua & Sanctissimum habemus
 nobis Patrem CLEMENTEM XIII , Opti-
 mum vere , Maximumque Pontificem , totius
 Orbis felicitati divinitus concessum , fe-
 liciterque Regnantem ; Te habemus illius
 gratia , præstantissimum S. R. E. CARDI-
 NALEM , insignium virtutum MAGNI PA-
 TRUI vestigiis , Pietate , Justitia , Clemen-
 tia , & Liberalitate quampropius hæren-
 tem ; Excellentissimum tui Patrem D. AU-
 RELIUM REZZONICUM Venetiis habuimus ,
 nobilissimi Equitis , amplissimique Procu-

ratoris Dignitate ornatum, ex quo etiam
 eximias animi tui Virtutes mirifice hau-
 fisti; D. LUDOVICUM tui denique simil-
 limum Fratrem habemus, qui iisdem &
 ipse, quibus jam Pater, Dignitatibus
 quam merito, & maxime fulget! Tan-
 ta ergo in rerum omnium amplitudine,
 & gloria, quæ vix commemorari præ-
 clara sit, summaque laus, magno & me
 cumulabis beneficio, atque honore, EMI-
 NENTISS. AC REVERENDISSIME PRINCEPS,
 si munusculum hoc meum humaniter quid-
 quam respexeris, tuaque summa aucto-
 ritate tueri illud digneris, meque ut pro-
 fuso, humillimoque animo Tibi totum,
 meaque omnia deferam.





IN ECCLESIASTICUM ORATOREM

IN HOC NOVISSIMARUM ANIMADVERSIONUM
LIBER PRIMUS

*Expenditur prima, qua Recentiores utuntur,
exquisita nimis dicendi cura, & copia.*

CAPUT I.



UM natura ipsa in cunctis optima sit rerum agendarum magistra, (1) eaque meliora sint, quæ natura, quam quæ arte perfecta sunt: etenim

(2) Numquam aliud natura, aliud sapientia dicet; nullum est dubium quin, veluti ex amplissimo fonte, innumeri exoriantur illorum errores, qui imperitorum more poetarum, atque pictorum, in exequendis artis cujusque

(1) Cic. 1. de Nat. D. (2) Iuv. Sat.

que præceptis, utique a naturæ institutis quoquo modo aberrant, illiusque mores optima imitandi ratione. Equidem si rem diligentius paulo expendamus, id nobis concedere plures etiam in Ecclesia Oratores quam maxime debent, vel exquisitis lucubrationibus ipsa artis confinia sæpe illi excurrentes, vel qui eorum dicendi inopia perfecte elaboratam concionem haudquam perficiunt. Sunt enim qui putent optimum esse orationis genus, quod selectis verbis, inusitatisque sententiis, remota doctrina, omnigenaque eruditione constet. At quamvis auditorum ingenium, & sensus, ut in voluptatis Paradiso Parentibus vetitum lignum vehementer allicere soleat mira quædam dicendi species; hisce tamen concionibus (1) non ingenuam, sed adulterinam potius, minimeque probandam præferunt orandi formam. In quo enim primum sita est Rhetoricæ ars, nisi ut bene quisque loquatur? id ergo & utili quodam, ingenuoque dicendi stylo, quo orationis sensus manifeste exprimantur, ipsaque veritas excipi omnium auribus luculentius possit: contra enim qui agit, vel ipsis statim adversabitur, gravissimisque

Lo-

(1) Muræ, *elog. prop. c. 3. & c. 6.*

Logicæ regulis, quibus in re qualibet exponenda, ut perspicuo utamur Sermone in primis docemur, ne quidquam obscuritatis verba audientibus præbeant, percipiendique laboris; otiosum enim Sermone (1) Fabius esse dicebat, quem auditor suo ingenio non intellexerit; proindeque (2) copiose loquens sapientia eloquentia ipsa appellata est, non pulchra quidem, aut formosa dicendi facultas, quod istiusmodi præclaro Oratoris Judicio ut temperata sit, a Rhetoris omnino requiritur. Oratores quidem scientiis omnibus instructi sint imprimis oportet; at tamen non iis ut ad pompam profecto illi abutantur, sed ut (3) satis calide, periteque de Reipublicæ causis agere possint, seu pacis, seu belli, seu juris, seu morum, aut cujuslibet liberalis artis: qui ergo & in Ecclesia sunt, ut de universis rerum christianarum generibus, propositisque rebus idem & ipsi efficere amplissime possint. Id vero utrumque sapienter conjungere quisquam poterit, qui in singulorum tractatione ita eloquens sit, ut (4) dicendo possit tenere hominum coetus, mentes

(1) l. 8. c. 2. (2) In partit. n. 23. (3) De Or. l. 1. n. 11.

(4) De Or. l. 1. n. 8.

tes allicere, voluntates impellere quo velit, unde autem velit deducere.

Nec contra nos est si aliter dixerunt doctissimi Ecclesiæ Patres, quique omnium eloquentissimi habiti semper fuere, ut mirum sit quanta eorum scripta omni eruditione plena sint, floribusque redundant. Maxime enim animadvertendum nobis est, illis multiplici hac fere oratione, institutoque dicendi opus tunc fuisse, quod non cum Fidelibus tantum fermocinari deberent, sed & cum Judæis, illis quoque permixtis, Hæreticis etiam, Idololatriisque hominibus. Quare cum his omnibus satis omnino faciendum esset, ita & eloquentiæ, quæ tunc temporis in usu erat, oblectamenti inducere, suis tamquam exercitus instructus agminibus, accitis etiam ad pugnam undique auxiliariis copiis; omnium quoque doctrinarum scientia, nec non argumentorum delectu, ad multitudinem cogere, atque moveri opus esse censebant. Cum vero ad morum tractationem, veluti in quamdam eloquentiæ arenam aliquando descenderent, quid vulgi captui magis accomodatum? quid eorum sententiis clarius? quid vulgarium verborum aptius fingi, aut excogitari umquam potest,

ut

ut ea omnia explicarent, quæ de rerum causis, effectibus, atque circumstantiis dicenda sumebant? Ita præcipue Chrysostomus divitis Epulonis crudelitatem exaggerans, inhumanitatemque in Lazarum omnium pauperrimum, quem ille præ foribus stratum, & multa quotidie precantem, non exaudire non modo, sed in eum vel paullulum oculos coniicere dedignabatur, plagis licet undique affectus esset, canibusque miserrimus; nec Dives tamen miserabatur, qui splendide adeo vivebat, qui inter amicos assidue epulabatur, qui bysso, & purpura, Regum more induebatur. En quo eximium Sanctissimi hujus Viri eloquentiam naturæ ferebat ingenium; non longe conquisita, nec fucatis quidem, scelestisque verbis exposita in medium afferendo, sed quæ in more posita perspicue viderentur, vulgarique sermone, quod proprium Oratoris maxime est (1) gravi, & ornata oratione, atque hominum sensibus, ac mentibus accommodata. Id autem minime possunt Concionatores nostri inani eorum facundia, quin ab orationis fine deterreantur animorum sensus, ut proinde merito Demetri-
um

(1) De Or. l. i. n. 12. Murat. Eloq. pop. c. 5.

um phalereum (1) Demostheni postpositum fuisse legimus. Quapropter & S. Cyprianus, tanta licet in eo esset dicendi vis, atque facultas, quam raro ea tamen usus ille fuit (2)? ob eam procul dubio Tullis sententiam, (3) quod dulce illud orationis genus, & solutum, & effluens, sententiis argutum, verbisque sonans, pompæ quam pugnæ aptius (quidem fit), Gymnasiis, & palestræ dicatum, spretum vero, & pulsum foro; nobisque cum Fabio lugendum merito est, (4) quod isti habitum ipsum orationis virilem, & illam vim stricte, robusteque dicendi tenera quadam elocutionis cute operiant, & dum levia sint, ac nitida, quantum valeant nihil interesse arbitrantur.

Ac profecto ita sui ipsius genere, partibus, atque rationibus circumscripta res quælibet est, totque abundat frugibus illius ager, utque arbores fructibus, orationis quæque argumenta, ut satis superque de vitii cujusque, atque virtutis natura, effectibusque dicendum sit, quin ex eorum finibus Oratori excurrere liceat; quo enim in foro utuntur etiam nonnulli vel digrediendi, seu exemplo-
rum

(1) Brut. n. 9. (2) S. Aug. de Doctr. Chr. l. 4. c. 14.

(3) Orat. n. 3. (4) Quint. l. 5. c. 12.

rum rationem, (1) non ad Litigantium utilitatem, sed ad patronorum jactantiam repertum fuisse putandum est. Quid enim? aliter ne summæ eloquentiæ viri, Hiperides nempe, Licurgus, Dinarcus, atque Demosthenes? Galba, Cato, Antonius, Crassus, Cota, Sulpitius, Hortensius, ac Romanorum princeps Tullius? Herodotus demum, Thucidides, Cæsar, & Livius in eorum historiis, vel ad cives, vel ad milites habitis quidem concionibus? Quid & clarissimi Ecclesiæ Patres, Basilius, Gregorius Nazianzenus, Chrysostomus, Leo magnus, atque Fulgentius, aliique plures, quos nimis longum esset recensere omnes? Id autem undenam illi? ex divinis profecto Sanctarum Scripturarum exemplis, cum veterum Prophetarum, tum Apostolorum denique, quorum dicendi arte (2) non solum nihil sapientius, verum nihil eloquentius videri possit: quodque præsertim perspicere est, Deum similiter eorum afflantem spiritum se se cujuslibet naturæ, indoli mirifice accomodasse; aliter enim Isaias, aliter Hieremias, aliter Amos, aliter Joannes, aliter Paulus locuti fuere, prout cujusque

pa-

(1) Quintil. l. 4. c. 3. (2) S. Aug. de D. C. l. 5. c. 25.

patiebatur facultas, studium, mentisque aptitudo. Ergo & nostra quælibet oratio (1) ornetur oportet genere primum, & quasi colore quodam, & suco suo; aut si quid præterea addendum sit, id solum ut in ornatu (2) quædam disposita, insignia, & lumina: quantum enim a Græcorum usu Asiatici omnino abhorrebant, tum a Romanorum instituto, ita illi, quos nunc attulimus, Ecclesiastici viri, a Patribus dissentiri videntur, eosque omnes disertos quidem nuncupari fas est, minime vero eloquentes.

Rejicitur quoque familiaris dicendi modus.

C A P U T I I.

NEque in eorum opinionem descendere possum, qui seu in Urbibus dicant, oppidis, vel ruris Templis, presso stylo, leni ubicumque, & æquabili morales texunt conciones, ac si historiam, vel aliquam doctrinæ partem explicandam susciperent; cum tamen historiæ locus, ac docendi munus alicujus tantum, non totius quidem orationis partis sit: idque fortasse

(1) D: Or. I. 2. n. 28. (2) Ibidem.

se quod ornata eloquentia pro futili quadam humanæ sapientiæ arte habenda sit, quæ obesse potius, quam prodesse audientibus possit. Verum quis neget, id vel maxime tum divinæ Legis auctoritati, tum Religionis conferre mysteriis? nam præclarissima hac dicendi ratione, qui inter sacros habetur Sapientiæ, librum græca melioris ævi eloquentia ubique olentem, Spiritus Sancti afflatu consecratum fuisse novimus, tum Sacrorum omnium Auctorum scripta veteris, novique Testamenti, & illa similiter, ac Tullianas omnes conciones, cæterorumque Oratorum declamationes conspiciere est. Ipse denique Romanus Catechismus, qui ex Tridentini Concilii decreto, Maximique Pontificis Pii V. jussu editus fuit, quanta eloquentiæ laude ornatus prodierit, nemo est qui ignoret. Quid enim in rerum natura, (1) salubri suavitate, vel suavi salubritate quid melius? nam quo magis illic appetitur suavitas, tanto facilius salubritas prodest: quodque natura in syderibus, in plantis, in lapidibus ipsis, minimisque animalibus nativa pulcritudine effinxit, (2) sic in oratione, ut ea, quæ maximam utilitatem in

B fe

(1) S. Aug. ubi sup. (2) De Or. 1. 3.

se continerent, eadem plurimum haberent vel dignitatis, sæpe etiam venustatis.

At cum Oratores nostri suggestum dicturi conscendunt, dignum certe argumentum sibi eligant non solum opus est, summeque necessarium; sed quantumvis ille popularis habeatur, æquo tamen stylo cum pro illis quidem dignitate, cum argumentorum ratione, cum denique singularium orationis partium varietate exponenda omnia sunt. Ac rursus si illi, (1) qui ad iustitiam erudiunt multos, stellis coæquantur in perpetuas æternitates fulgentibus; quidni sacra eorum eloquentia omnium oculos suis perstringere ornamentis, atque lumine non oportebit? ideoque & omne quidem Concionatoris munus absolvere, ut oratorie loquantur, (2) quod totum dicendi, movendi, delectandi partibus continetur (suis & Italicæ Linguae, (3) verborum, ac sententiarum figuris). Disertos enim satis putat Tullius dicere quæ oportet; ornatè autem eloquentissimi proprium esse. Quis autem eloquens erit? ille profecto, (4) qui & humilia subtiliter, & magna graviter, & mediocria temperate dicere possit. Neque ista sane elo-

(1) Dan. 13. (2) Quint. l. 8. in proem. (3) Bemb. Prof. (4) Or. n. 29.

eloquentia alicubi solum in oratione requiritur, sed ubicumque contigerit & sacri, (1) & prophani docent Rhetores: (2) illa enim ut gravis, ut erudita sit, ut liberalis, ut admirabilis, ut polita, ut sensus, ut dolores habeat, non est singulorum articulorum, in toto hæc spectantur corpore. Veruntamen his omnibus prætermis- sis, quod maxime obvium est, submis- se, aut mediocriter agunt Nonnulli; nec ut satis se fecisse arbitrentur, singulorum sensus, aut verborum gravitate, aut dicendi temperantia, vel subtilitate quidquam se- cernere curant. Ita ille, qui domesticam pacem dum Populo aliquando suaderet, eum a quibusdam discordiæ causis cavere tantum iussit, quas singillatim cum suis Auditoribus uno eodemque stylo, ut ini- tio temperate exponendas suscepit, ad fi- nem quoque perduxit. Qui oro sunt isti rerum mortalium tractatores potius dicen- di, quam Oratorum nomine digni habeantur? huiusmodi enim (3) philosophia sine veris ornamentis, eloquentes non facit, sed solum disertos.

Certe duo illa Ecclesiæ lumina, nec non Ecclesiasticæ eloquentiæ decus, Gregorius

B 2

Na-

(1) S. Aug. c. 17. ubi sup. (2) De Or. 3. n. 25. & Bem. Pr. (3) Or. n. 4.

Nazianzenus, & Leo Magnus, cum de morali aliquo argumento orationem instituebant, mirabili facundiæ arte, atque dicendi gravitate quam facile omnes superarunt? quantum scilicet aquarum rivuli magnis obruuntur fluminibus: cæteri autem, ii-que maximi Ecclesiæ Patres cum ad Catecumenos sermonem converterent, subtiliter quidem omnia dicebant; cum vero contra spectaculorum insaniam, aut Potentium superbiam insectarentur, aliaque vitia, & subtilia, & grandia, & temperata verba disposita habebant: quamvis, ut Muratorius quoque advertit, extemporaneis concionibus illa fecissent; ideoque familiari prope sermone: (1) nam cum aliquid agendum est, & ad eos loquimur, qui hoc agere debent, nec volunt tamen, tunc ea, quæ magna sunt, granditer dicenda sunt, & ad flectendos animos congruenter. Quamobrem cum Asiæ Oratoribus id vitio præcipue Fabius vertisset, quod (2) in illis iudicium in eloquendo, ac modus deerat; nostris contra quod aridi sunt cum illo recte illis obiicimus, suis ut floribus, prata, ut pictura coloribus, ut foliis arbor, ut suo, si statim deficeret, lumine sol;

(1) Aug. c. 19. ubi sup. (2) Instit. l. 8. in proem.

sol; sicque utrinque apparet in hoc, & vitium, & virtutem esse dicendi. Cur denique suggestum a Cathedra, a catechesis loco Altaria fermocinando distinguimus? id profecto cum in Civitatibus, cum ruri quidem, ut inter Missarum solemnia Homiliis, temperatoque sermone utamur cum pueris, idiotisque hominibus; omnis autem orationis dignitas, ut ad altiorem evehatur locum, a Majoribus nostris didicimus, non eorum quidem arbitrio, sed ipsa ductante natura, quæ sponte sua unumquodque ab alio sermonis genere discernendum esse optime quidem intelligit; illudque (1) in Ecclesia institutum semper obtinuit, præcipuisque ab illius tum veteribus quidem Patribus, cum recentioribus ad nos usque sapientissime retentum est. Hoc itaque (& ut perfectum habeamus Concionatorem) (2) studium adhibendum est, hoc exercitatio petit, hoc imitatio... hoc maxime orator oratore præstantior, hoc genera ipsa dicendi alia aliis potiora. (3) Ut scilicet in re omni consideremus quid aptum sit, tempori consentaneum, atque personæ, tum quid in dictis, factisque debeat.

B 3

Ne-

(1) Mur.El.pop.c.B. (2) Quint.ubi sup. (3) Cic.orat.& Brut. lib.

*Neque admittendum, quod sæpius usurpatur,
quoddam disputationis genus.*

C A P U T III.

QUos ergo imitari debemus? num illos, qui toti in eo sunt, ut quod contra Dei legem est, Religionisque institutum, malum esse probare contendunt? Verum a pueris ita omnes docemur, ut Catechumeni olim fidei, legisque dogmata, priusquam Baptismi initiarentur in Sacramento, ut quæ agenda, aut vitanda essent omni ætate, atque negotio probe scirent: idemque per Ecclesiæ Ministros singulis festis diebus audiunt Fideles, vel domi Parentum Filii, vel in Gymnasiis Magistrorum ope, atque hortatu. Quare importune id fieri omnino videtur, nisi graviora sint æque alia, quæ ab Oratore tractantur: ideoque sane arguendum censeo quemdam ex Concionatoribus nostris, qui cum primum de Sacrorum veneratione Templorum generice quædam posuisset, hisque tamquam præcipuis Altissimi Domibus omnem conferendum esse religionis cultum; eos totidem inde insectari objurcationibus cæpit, qui in iis, quæ sæcularia

ria

tia sunt, quam quæ Spiritualia, & Sancta, mente revolvunt; qui liberis oculis non sacris Mysteriis, sed alienis quibusque rebus animo incumbunt, qui de eorum agitandis quæstionibus forenses consulunt Patronos, vel domestica tractant; intolerabilem denique mulierum invecundiam, qua in se ipsas omnium oculos, cogitationesque convertunt. Recte quidem, cum res quælibet communium argumentorum ope probata sit, a thesi ad hypothesim transitum fieri & Rhetores docent; nihilominus non Oratoris, sed Sophistarum sequimur munus, cum ita a majori veluti propositione, ad minorem argumenta ducuntur, Theologicas vel affectando doctrinas, quæ ad Cathedram magis, quam (1) ad suggestum pertineant, parumque, aut nihil ad Populi captum: proindeque a vulgari sermone quam longe sint, nemo est, qui plane non videat,

Quapropter cum in hujusmodi cognitionis genere, ut Tullii utar sententiis (2) in quo quid sit id, de quo agitur, quærat, duo sint item genera, quorum in altero disputandum est an aliud, an illud sit, ut pertinacia, & perseverantia; in altero

B 4

au-

(1) Murat. El. prop. c. 8. (2) Topic. n. 19.

autem descriptio generis alicujus, & quasi imago exprimenda sit, ut qualis sit avarus, aut superbus; viderit Concionator maxime oportet, quid Auditoribus magis expediat: in Deliberativo enim genere, ut optimus quisque facit, cum Ecclesiasticæ, tum forensis artis Orator, attentis profecto cujusque juris rationibus, atque doctrinis, quibuscum omnia comparanda sunt; qualis sit alicujus rei vitii, aut virtutis natura, aut partes vel maxime ostendendæ sunt, quod homines ea vix quidem advertant, quam malum esse mala committere, quod raro, aut numquam inficiari quisquam audeat: in (1) rebus enim apertis argumentari tam stultum adeo putabat Quintilianus, quam in clarissimum solem mortale lumen inferre. Nam præter id, quod dum aliam plures sequuntur differendi methodum, illustrandis doctrinis magna impeditur orationis pars, quæ tædium auditoribus affert; minus quidem relinquitur loci ad arguendos impiorum mores, eaque explicanda, quæ de Finitæ cujusque quæstionis, seu causæ statu, partibus, atque magnitudine rei agenda plenissime sunt, quæque (2) ex rerum complexu,

(1) Quint. l. 5. c. 12. (2) Quint. l. 2. c. 5.

plexu, personarum, temporum, cæterorumque (tractantur). Verum id aliquando opus sit; (1) fortasse enim rebus ipsis jam cognitis commovebuntur, ut eos non oporteat majoribus eloquentiæ viribus jam moveri. Equidem, quamvis alterius etiam status, & generis causas egissent magni Græciæ Oratores, ipseque Romæ Tullius; id eos tamen usurpasse perspicuum habemus, ut non ipsam tantum rem, sed quæ ad hominem spectant, ut ajunt, quemadmodum & in Scripturis Sanctis, nec non Ecclesiæ Patribus, præ oculis jugiter habuerint, diligenterque explicarint. Si enim Orator Poetæ in multis (2) ornandi generibus socius est, ac pene par, quæ descriptionibus maxime præstant; quidni ex dictorum utique complexu probare, explanareque omnia, quod Illustratio, seu Evidentia appellatur; cum ex iis, quæ doctrinarum sunt, auctoritatibus, atque exemplis?

Præterea numquid eo fere modo ista tractanda sunt? (3) Non probo illos (ita Ludovicus Granata,) qui unam dumtaxat concionandi formam sequuntur, & quod semel faciunt, semper faciendum esse decer-

(1) S. August. ubi supra c. 12. (2) De Or. l. 1. n. 16.

(3) Reth. l. 4. c. 3.

cernunt. Id enim solutam, atque nativam concionem minime decet, qua libere omnia, varietque dicenda sunt; cumque Oratores isti Scholasticorum regulis de christiana Philosophia cum plebe ita pertrahant, (1) vitium quidem vel maximum est (ficuti in foro causarum actoris) a vulgari genere orationis, atque consuetudine communis sensus abhorreere. Sin minus vero a populo, ad rerum quod attinet honestatem, atque utilitatem, intelligitur; (2) differenda sunt hæc, & secundum communes magis intellectus loquendum est: ut omni utamur eloquentia ad (3) commovendos auditorum animos, non quid agendum sit, ut sciant, sed ut agant quod agendum esse jam sciunt. Clama (ita Isaiam Dominus jussit) ne cesses, quasi tuba exaltata vocem tuam, & annuntia populo meo scelera eorum, & domui Jacob peccata eorum (4): quod & cæteri omnes Prophetæ, atque Apostoli sæpe exequuti diligentissime sunt. Hoc enim ex ipso intelligitur Ecclesiastici Oratoris munere vitia annunciandi, atque virtutes quæ quidem expressa similitudine, ac veluti egregia quadam

(1) De Orat. l. 1. n. 3. (2) Quint. (3) S. August. ibid.

(4) Isai. c. 58.

dam pictura, vividis morum coloribus significari maxime oportet: (1) summa enim eloquentia est amplificare rem orando id desideratur ad fidem faciendam vel cum explanamus aliquid. (2) Qui ergo dicit cum docere vult, quamdiu non intelligitur, nondum se existimet dixisse quod vult illi, quem docere vult. Lege, queso vel Magni Basilii sermones, aut multiplices Divi Chrysostomi ad Antiochenum populum Orationes, tam varie, ornateque expositas; quot enim in illis dicenda ediscimus, quæ pravas multasque respiciunt animorum affectiones, malitiam, calliditatem, imprudentiam, temeritatem, plurimosque opinandi errores? Nonne denique ex his eloquentiæ fontibus veterum Græciæ Oratorum Conciones, ac Romanorum simul deductæ fuere, tum quæ in recentioribus leguntur, optimisque Historicorum libris? (3) In id ergo maxime nitendum, cum (4) ea sit orationis pars, quæ rem constituit ante oculos: id enim maxime attingit sensus; sed cæteri tamen, & maxime mens ipsa movetur. Ideoque & Reipublicæ ipsi Oratores eorum

(1) De Or. lib. 3. n. 27. (2) S. August. ibidem c. 12.

(3) Partit. n. 6. (4) Ved. Giac. Diedo Stor. Veneta.

rum omnium rationem (periti esse debebant), (1) quæ de naturis humani generis, ac moribus a Philosophis explicantur: quin imo præ cæteris omnibus, quod ad morum pertinet scientiam, semper Oratoris fuit, ut nisi tenebimus, nihil Oratori, in quo magnus sit, relinquamus.

Quam utili careant conciones varietatis beneficio.

C A P U T IV.

EX iis autem, quæ diximus satis clarum est, nullum esse posse Varietatis genus, quo in dicendo uti maxime refert: nam quod Ecclesiastici illi Viri suo quisque cæperunt instituto, idem, ut hucusque retulimus, fere omnes sequuntur. Magnum certe eloquentiæ istiusmodi vitium; nam cum (dictio) (2) proluxa est in uno genere, minus quidem auditorem detinet; cum vero fit in aliud ab alio transitus, etiamsi longius eat, decentius procedit oratio... quibus non sinuntur in eorum, qui audiunt, frigescere, vel tepescere sensibus. Huiusmodi autem (3) tractatio varia esse debet,

(1) De Or. l. 1. u. 15. (2) S. Aug. ibid. c. 22. (3) De Or. l. 3. n. 1.

debet, ne aut cognoscat artem, qui audit, aut defatigetur similitudinis satietate. Jam ad Infimum quod pertinet, atque Sublime orationis genus, utrumque dicenti opus maxime est; (1) nam interpositis, quæ dicenda sunt, submissus, bene reditur ad ea, quæ oportet granditer dicere, ut distictionis impetus, ut maris æstus, alternet. Numquid enim, quod in sensibus quotidie experimur, idem prorsus animorum fastidium haud pariet oratio? in qua, (2) ut ex poetis, vel oratoribus coniecere possumus, jam patet concionem distinctam, ornata, festivam, sine intermissione, sine reprehensione, sine varietate, quamvis clara sit, coloribus picta, vel poesis, vel oratio, non posse in delectatione esse diuturnam. Quapropter unumquodque ex recensitis generibus audientium animos offendat necesse est, nedum illis aliquandiu placeat; non primum quidem, quod totum in voluptate positum est; non secundum, quod inornate expositum, ubique statim languescit; non tertium denique, quod disputationis nomen potius obtineat, quam Oratori conveniat.

Haud ita quidem in eorum concionibus,

(1) Idem S. ibid. (2) De Or. l. 3. n. 25.

bus, suum quisquis sequutus naturæ ingenium, Demosthenes, Tullius; nec in eorum poësis, Homerus; Virgilius, Theocritus; nec in suis pariter libris, Chrysostomus, cæterique Patres: mirum est enim quam avide in iis percipiendis detineatur legentis animus, cum semel eorum scripta vix prægustata fuerint. Nam quid prohibemur, (1) si magna sunt ea omnia, quæ dicimus, novas inire philosophandi vias? atque alia excogitare argumenta? num quid nobis ad amplissimam dicendi rationem deest eadem cum singuli argumenti natura, tum ipsiusmet mentis ratiocinandi facultas? Etenim cum ea omnia, (2) quæ ars consumarit, a natura initia duxissent; omnibusque artis præceptis imbutus sit Orator noster, totque instructus jam Disciplinis; nihil illi facilius, ut iis, qui præcesserunt, par exhibeat ingenium. Quod enim primum est, è Sanctarum certe Scripturarum thesauro præclaras ediscere erit, atque divinæ penitus Philosophiæ sententias, ex Sapientialibus maxime Salomonis libris, Evangelicisque lectionibus: (3) sapienter enim omnia dicit homo, tanto magis, vel minus, quanto in Scripturis

San-

(1) Idem S. ibid. c. 18. (2) Quint. l. 1. c. 16. (4) Idem S. c. 8.

Sanctis magis, minusve profecerit. Præterea si quos commemorati sumus, Auctorum, Sanctorumque Patrum, cæterorumque optimorum scripta manu diligenter teras: nostris autem temporibus, maxime efflorescente Italica lingua, Ioannis Casa ad Carolum V. divinam prope orationem; easque Etruscos inter Auctores, quæ scelectissimæ habentur, atque Venetiis editæ nuper fuere; (1) donec illorum ingenium, & artem, omnemque eloquentiam sis plane assequutus. Nam qui (ut S. Augustini utar verbis) (2) non solum sapienter, verum etiam eloquenter dicere vult, quoniam profecto plus proderit, si utrumque potuerit, ad legendos, vel audiendos, & exercitatione imitandos eum mitto libentius, quam magistris artis Rethoricæ vacare præcipuo.

Ex his principum eruitur in commovendis animis impedimentum.

C A P U T V.

AT quis non videat ex hoc capite maximum oriri pro auditorum commo-

(1) Vid. Raccolt. di Prof. Fiorent. (2) ibid. c. 5.

motione impedimentum, in qua omnem Oratoris vim, atque victoriam sitam esse novimus? Nihil enim tam proprium, atque utilius esse potest, quam cum alicujus rei veritas a nobis clare percepta fuerit, ex omnibus, quæ in ea continentur rationes, concionem statim instruere, cum sponte omnia, & singula maxime occurrant, ac totidem veluti ex uno fonte rivuli, pulcherrimæ quidem sententiæ, verborumque delectus. Hinc fervens adeo, & gravis in dicendo Demosthenes, quia non futilibus rerum argumentis, sed patriæ, ac civium suorum bono excitatus, nec non agendarum rerum magnitudine, ita in eorum afficiebatur commodum, gloriæ amplitudinem, atque felicitatem, ut inde potissimum maximæ laudis, ac omnium oratorum principis consequutus sit. Eadem omnino esto Ecclesiasticis Concionatoribus ratio: (1) ad supernum enim desiderium inflammare auditores nequeunt quæ frigido corde proferuntur: (2) & ut primum valeant apud nos, quæ valere volumus, afficiamurque antequam afficere conemur. Nam fieri numquam potest, ut doleat is, qui audit, ut oderit, ut invidet, ut

(1) S. Gæg. in Psal. (2) Quint. l. 6. c. 3.

ut pertimescat aliquid, ut ad fletum, misericordiamque deducatur, (1) nisi omnes ii motus, quos orator adhibere volet iudici, in ipso oratore impressi, atque iniusti esse videantur. Cur autem est, ut tam frigide loquantur Concionatores nostri? id profecto, quod pauci sint, quos Prophetarum more læsi Numinis zelus, animarum perditio comedat, quique eorum lacrymis expetant populorum scelera deflere. Ut ea enim sponte fluant, quibus concionis idea instituatur, sedato animo excipiunt, dicendique argumenta; illaque plerumque ab editis Oratorum libris, tamquam ex aliorum officinis merces, magna ex parte transferre minime dubitant: sicque non suis quisque rationibus, sed aliorum verbis, atque sententiis ad plebem loquuturi accedunt; interim memoriæ fidei potius, quam auditorum utilitati incumbentes.

Multa ab iis quidem in eorum adducuntur concionibus, quæ si recte exposita essent, non mediocriter commovere animos possent. Magna enim ille quoque dicebat, qui Invidiam affirmabat vitium esse Dei charitati præcipue oppositum, cum ex eo odio habeantur, quæ in proximi bonum

C

a Deo

(1) De Or. l. 1. n. 45.

a Deo conferuntur, parvi licet sint illa momenti: vitium quidem dupliciter malum, quia simulata studii specie, atque virtutis induitur, ut noceat; in homine item crudeliter magis, quam in feris unquam sæviens, quin ulla sanguini, hospitalitati, dignitati, atque beneficiorum utilitati ratio ullo modo habeatur. Magna, inquam, hæc omnia, maximeque observanda. At cum singula cursim omnino ille perstrinxerit, brevibusque illustrata Scripturarum exemplis, minime quidem cum iis conferenda erant, quæ Divus Basilus de Invidia præclare fermocinando differuit, mirifice omnia augendo, popularique doctrina, atque dicendi modo. Ea ergo & Concionatori nostro, ad magnam affectuum commotionem, in illis omnibus, cum invidentis nequitiam, illataque damna, aperienda plane erant, tum dæmoniacas fraudes, omnemque nocendi artem prorsus detegere, graphiceque describere oportebat: hæc enim omnia, si recte attendantur, in magno quolibet argumento ultro exequi solent commoti animi affectus, hancque & magni (1) homines tribuunt Chrysofomo summam, divinamque lau-

(1) Murat. El. pop. c. 8.

laudem, expetiturque vehementer in singulis Dei Verbi Ministris. Ita quidem Tullius in Catilinam, cum Romæ consulem ageret: toto enim inspectante Senatu, ipsoque audiente adversario, nefariam illius conjurationem ostendit, proscriptiones, incendia, Patrum, atque Reipublicæ clades; tantumque in dicendo profecit, apertis quidem, prout causa ferebat, non obscuris, elegantioribusque sermocinandi modis; ut solutis hostium machinationibus, conjuratisque cum fociis pulso jam Catilina, salva consisteret bonorum omnium, atque Reipublicæ salus.

Jamque Philosophia, rerumque usu docemur, (1) motus animorum, partim magnitudine rerum, partim earundem præsentia, vel descriptione maxime concitari; idque omnigena quidem, tum verborum, cum sententiarum amplificatione: id enim, agebat Tullius, (2) desideratur in omnibus, ad fidem faciendam, vel cum explanamus aliquid, vel cum concitamus. Sed in hoc, quod posterius dixi, amplificatio potest plurimum, eaque una laus Oratoris est, & propria maxime. Qua-

C 2

pro-

(1) Gran. L. 3. c. 10.

(2) De Or. l. 2. n. 21.

propter, cum ad hoc perficiendum interiori careant igne è nostris quidam Oratores, non divino solum, sed naturali etiam ad proximorum salutem, recteque vivendi honestatem, ut illi vel in principiis dicendi frigeant opus est: ut acurata enim, ut miranda, ut instructa, ut elegantia, ut plena, ut longe conquistata sint exordia magis ipsi student, quam, ut in iis statim necesse est, commovendi vim aliquam habeant. Frigent rerum amplificatione, ea, sicuti jam exposuimus, inverso ordine, nec satis quidem tractantes; ut nihil, aut vix incitentur auditorum animi. Frigent denique cum ad perorandum pervenerint; quibus enim, veluti sanguis in corporibus, defuit istiusmodi virtus, audientesque nullibi ante affecerant, eodem plane sensu desinat oportebit oratio; vel si quid mirum forte attulerit, id citius ex animo, auribusque prætervolet. Recte ergo, sapienterque monuerat S. Hieronymus: (1) Docente te in Ecclesia non clamor populi, sed gemitus suscitetur. Lacrymæ auditorum laudes tuæ sint. Præ iis enim, quæ in foro agitur quæstiones, longius in sacris & principia, & cæteræ partes orationis habere hanc

(1) Epist. ad Nepotian.

hanc vim magnopere debent, ut ad eorum mentes, apud quos agitur, movendaſ permanere poſſint (1). Sed maxime proprius eſt locus in exordiando, & in perorando. Libeat animo parumper expendere vel David pſallentem, vel Paulum docentem, vel Joannem Dei amorem ſuadentem, quo impetu, qua virtute, quanta ſuavitate, quo ſtudio legentes incendunt; cum id plane ſit Apoſtolice loqui, non ut falſo vulgus interpretatur, incultu, ſimplicique ſermone. Noſtri autem Concionatores in ea quidem Stoicorum ſententia eſſe videntur, male nos uti poſſe animorum motibus, quique illos in iudicium, ſeu auditorum mentibus concitant, ſcelus eos nefarium facere. (1) Verum quid hæc duo proferunt homini, qui & confitetur verum eſſe quod dicitur, & collaudat officium? . . . fruſtra perſuadetur verum eſſe quod dicitur, fruſtra placet modus ipſe, quo diſcitur, ſi non ita dicitur ut agatur.

His vero expenſis, facile quidem intelligi poteſt, cur, dum cæteræ omnes ſcientiæ, natura præcipue duce, eo uſque pervenerint, ut his nihil ferme addere liceat; ſola Eccleſiaſticorum hominum eloquen-

C 3

tia

(1) S. Auguſt. ibid. c. 13.

tia non eandem sibi peperit laudem, imperfectusque hujus liberalissimæ artis usus plerumque superfit; tum inani quidem, quam afferunt, verborum pompa, obscurisque sententiis; tum humiliori dicendi genere; tum rectæ dispositionis, ornatus, varietque loquendi defectu; tum vehementer denique, ad animorum motus, concipiendi, exprimendique ratione. Et licet in cæteris rebus exequendis non mediocrium tantummodo, sed & maximarum artium studiis optimi multi habeantur; plures etiam, excellentesque Oratores proferri possint supra Ecclesiasticos viros, vel in Reipublicæ recte, sapienterque regendæ concionibus, vel pro Clientum defensione, atque incolumitate, vel denique pro humanarum Legum observantia, coram Principibus, Judicibusque mirifice dicentes; ut, sicut de præclarissimis exercituum Ducibus historia narratur, neque propius res attingere possent, nec luculentius, aptioribusque verbis ab iis explicari, neque pro eorum dignitate, graviora expeti, atque politiora.

Prioris libri finis.



IN ECCLESIASTICUM O R A T O R E M

NOVISSIMARUM ANIMADVERSIONUM

LIBER SECUNDUS.

*Qualis esse debeat Orator, & quis bujus
libri finis.*

C A P U T I.



Aud parum esse momenti in dicendo rectum sequi naturæ institutum, fateor ego quidem, magisque aliorum in hac arte errores expendi, quam singulas ipsiusmet naturæ persequi leges posse, easque probe explicare: divina enim quædam res est istiusmodi in homine facultas, qua ille hominis vim quodammodo excedens, Deo quam

C 4

ma-

maxime appropinquare videtur. (1) Quid namque esse potest, vel tam admirabile, quam ex infinita hominum multitudine illum existere unum, qui id, quod omnibus natura sit datum vel solus, vel cum paucis facere possit? aut jucundum cognitu, atque auditu, quam sapientibus sententiis, gravissimisque verbis ornata oratio, & perpolita? aut tam potens, tamque magnificum, quam populi motus, iudicum religiones, senatus gravitatem (ut Cicero agebat) unius oratione converti? Nonne præstantissimum divinæ Sapientiæ Donum, ut quæ olim cum multifariam, multisque modis loquuta sit in Prophetis, novissimeque in Dei Filio, eadem aliquando in ore sit nostrorum in Ecclesia Concionatorum, ut Fideles perpetuò eodem pascantur Dei Verbo, salutisque præceptis? At inde perspicuum maxime est, ut is sit oporteat Christianus Orator, quem clarissimi Rhetoricæ artis Institutores scientiis omnibus instructum esse volebant. Tullius (2) enim eum solummodo Oratorem plenum, atque perfectum esse, qui de omnibus rebus posset varie, copioseque dicere; nobisque eadem subest omnino, potiorisque muneris ratio, sine

(1) De Orat. lib. 1. n. 8. (2) ibidem.

sine diligentissima peruestigatione omnium rerum, quæ de naturis humani generis, ac moribus a Philosophis explicantur admo- veri orationem minime posse ad sensus animorum, atque motus inflammandos, vel extinguendos; (1) hæcque semper fuisse, quemadmodum juncta natura, sic officio quasi copulata, ut iidem sapientes, atque eloquentes haberentur. Quidquid ergo in philosophicis Scholis quotidie traditur de divinis, humanisque rebus, de cælestibus, cæterisque physicis notionibus, nec Oratorem nostrum fugere quidem debet; nec quidquid Sacris continetur Scripturarum voluminibus, ut Dei attributa, divinæque Legis rationem intelligat; quidquid Sacrarum rerum hystoria, vel Ecclesiæ docemur temporibus; Theologicisque demum institutis, quibus Ecclesiæ, atque Sanctorum Patrum doctrinis imbuatur animus: iisque & historicam adde omnium sæculorum cognitionem, quibus cæterarum Gentium religio, qui mores fuerint ediscimus, quibusque jam nunc diversa a nobis ratione, toto terrarum orbe regantur; graphicam denique omnium regionem, Populorumque notitiam, quibus puero-
rum

(1) ibidem.

rum veluti conditione exuti, patriæ, ætatisque nostræ finibus aliquando excedimus. His utique pulcherrimis, utilissimisque Scientiis si, ad illius perfectionem quod reliquum est, refertus Orator; si Dei Spiritu repletus, qui oratione, rerumque divinarum contemplatione attrahitur; si eximia animi præstantia, & robore; si dulcissima facultate dicendi comendetur; si jucundum omnibus vultum præferat; si denum omni ornatus virtute populo se se audiendum exhibeat, vere sapientis nomen jure sibi adeptus fuerit; minimeque dubitandum erit, quin & magnos allaturus sit hujusmodi eloquentiæ fructus. Verum præclaro etiam mentis consilio ut plurimum valeat, frustra hic subiiciendum existimo; cum eloquentia ipsa de summis una virtutibus sit; illud inquam judicium, & ratio quædam alte petita, quæ omnia perpendens, & comparans, eligat alia, alia reiiciat, disponat; ut prudenter, & compositè, & ornate dicat quibus cum agenda res est; (1) qui audiant, frequentes, an pauci, an singuli; tempus gaudii, an luctus, pacis, an tribulationis, festinationis, an otii: omni enim in re posse, quod decet

(1) De Or. l. 3. n. 55.

decet facere, artis, & naturæ est; scire autem quid, quandoque deceat, prudentiæ.

Huic ergo aliquam & nos facem submittere audemus, boni cujuscumque amore, non præsumptionis loco; iis profecto commissis, plurimisque artis doctrinis, quæ innumeris propemodum habentur libris. Quid enim utilitatis ea omnia afferant, post emensum longioris etiam temporis studium? ut jure quidem Rhetores pulsi Roma fuerint Tullii censoris edicto, utpote quia præter hanc exercitationem linguæ, nihil esset doctrina, aut humanitate dignum aliqua scientia: nam quæ observanda jubentur Discipuli, quæque brevi admodum studii curriculo percipi ab iis possunt, ut optimorum tantum Auctorum dicendi præstantia agnoscatur, eamque imitemur, conferre magis, non ad eloquentiam discendam, atque exercendam merhcule valent. Aliam ergo aggredimur viam eos allocuturi, qui omnia, quibus constat hujusmodi ars, præcepta jamdiu didicerint, & quomodo in hoc, quod Anaximenes etiam Concionale genus vocabat, iis utendum sit, agere tantum maluimus. Quare, ut cujusque fere est optimi Artificis, ad V. nos item Capita revocanda omnia,

nia, cum Tullio, atque concludenda censuimus, quæ præclarissimæ Eloquentiæ usum spectant: reperire primum, quod dicat Orator (1); deinde inventa non solum ordinare, sed etiam momento quodam, atque iudicio dispensare, atque componere; tum ea denique vestire, atque ornare oratione; post memoria sepire; ad extremum agere cum dignitate, & venustate: ea quidem componendi usus differentia, quam hic tradere in Oratoris commodum in animo est, cæterisque præ Ecclesiasticis etiam Rhetoricæ libris, abstractioris illi utique, alteriusque qui a nostro, methodi sunt, ut quæ prima erunt, brevi sane negotio, comparari ab eo possint; vulgari scilicet naturæ ductu simul, ac præstantiori artis ingenio, atque doctrinæ. Nam si animi, atque ingenii celeres quidam motus in illo esso debent, qui ad excogitandum acuti, & ad explicandum, ornandumque sint uberes, & ad memoriam firmi, atque diuturni; vix in hac quidem re aliquem ex iis facessere oportet; cumque subitam haberi posse concionem probaret Cicero, ultro etiam affirmavit, ut qui scribendi consuetudine ad dicendum venerit, hanc

(1) Odat.

hanc afferet facultatem ; ut etiam subito si dicat, tamen illa , quæ dicentur , similia Scriptorum esse possint. Sed operi manus jam admovenda.

Sapienti judicio opus esse in argumenti delectu.

C A P U T I I.

AC primum, cum Oratoris munus tam grave, magnificum, divinumque sit; cumque magis rei alicujus objecto excitemur, quo pulchrior, & gravior illa percipitur; id opus imprimis erit, ut sibi dignum, & ad ciendos animi motus magnum quoque rerum dicendarum afferat argumentū, vel quod hujusmodi boni, seu mali vulgo habeatur, vel quod præter hominum opinionem magnum ostendi possit; de iis enim in Suaforio, vel Dissuasorio dicendi genere differendum maxime est. Unde autem ista? Si, quemadmodum in primo jam inuimus libro, ex Divinarum fontibus Scripturarum, quæ in illis frequentius reperiuntur, admiranda quædam excipiantur, pulcherrimæque Sapientiæ verba, atque sententiæ; eaque ad sua referantur, atque præcipua Christianæ Doctrinæ Capita, ut

ut in Romano etiam Catechismo de quibusque concionandi generibus, vel divinæ Scripturæ interpretationibus, sapientissime traditur. Hujusmodi autem sunt vel Samuelis ad Saul objurgatio simul, atque admonitio: melior est obedientia, quam victima; itemque David: impietas ab impio erit. Hujusmodi rursus innumeræ Salomonis sententiæ, ex uberrimis veluti locis, erutæ sapientialibus Libris; hujusmodi Sacratissimæ Evangelii Doctrinæ; vel cum sæculi divitiæ spinæ vocantur; aut cum legitur: qui amat animam suam, perdet eam; vel denique cum docet Apostolus: corrumpunt bonos mores colloquia prava. Quibus haud inconcinne veterum Philosophorum monita conjungere quoque liceat, eaque divinis verbis, sententiisque, ut dictum superius fuit, probare, cum a summa Dei veritate, in hominum mentibus quandoque illucescente, edocti illi fuissent, ut Solonis dictum: nonnisi post mortem quemquam vocari beatum; Biantis similiter: infelicem, qui infelicitatem ferre minime posset; & Valerii Maximi: non plura habere, sed pauca sibi optare, divitem afficere; quæque nos ex quotidiano rerum omnium usu fere usurpamus: ut nihil

hil demum ille possideat, qui sibi omnia curat; id proximum esse cuiquam mali, quod aliis intentat; sponte labi ex arbore pomum, cum ad maturitatem pervenit, ut sceleratorum hominum finis aliquando significetur; aliaque plurima.

At, quamvis magna sint, quæ tradenda suscipimus, ea nihilominus, ut aliquam referant utilitatem, opportune quidem proferenda Auditoribus sunt, summoque in rebus disponendis iudicio, atque consilio Oratori opus est, quid dicendum illi sit, quid tacendum, ne communia solummodo, quo ordine, quo stylo, quo denique concionandi genere; ut quibuscumque loci, temporis, personarum, cæterorumque circumstantiis accomodata sint, ut Dei Verbi Minister se omnibus omnia factum esse profiteri rectissime possit, singulisque ea præbere doctrinæ alimenta, quæ spiritum augeant, (1) prout cujusque exigit ætas, ingenium, conditio, mores. Neque enim fortuito, & sine huiusmodi rerum singularium inquisitione, atque prudentia, quidquam Artifex omnis molitur, neque ædificium Architecton, neque simulacrum Statuarius, neque Musicen Cantor instituit,

(1) In Catech. Præfat,

tuit, neque instruit exercitum Dux, nisi iis omnibus, quæ conveniunt, quæque opponuntur expensis: (1) nam qui aut tempus quid postulet, non videt, aut plura loquitur, ut se ostendet, aut eorum, quibus cum est vel dignitatis, vel comodi rationem non habet, aut cuique in aliquo genere aut inconcinnus, aut multus est, is ineptus est. Nec enim aliunde Ecclesiæ Patres tam egregias instituebant, (2) expoliebantque conciones, adeoque incendebantur vel Martyres alloquendo cum persecutionis fervor magis magisque in Christi arderet Discipulos; vel cum Nati Domini commoverentur Mysteriis, cæterisque Reparationis nostræ solemnitatibus; vel jejuniorum Tempora, publicæque expiationis dies ii recolentes; vel denique præcipuorum Natalitia Sanctorum; iidemque Heliam imitati, quam acriter impiorum hominum mores, atque inventa infectati maxime sunt? Magnopere ergo ab institutis recedunt, nec satis quam optimus sit opportunus sermo dignoscunt profecto Oratores, qui aut vitia exaggerant, quæ Audientibus imputari vix possunt, aut præter Ecclesiæ sensum,

&

(v) De Or. l. 2. n. 4.

(2) SS. Cyrian. Leo Magn. Greg. Naz.

& morem, argumenta pertractant, quæ solemnî cuiquam Festo diei, institutique Temporis rationi minime congruunt, spemque Fidelium longe decipiunt, eorumque detrahunt bono; aut in communi animorum, nec non multitudinis commotione, ea tunc maxime reticent, quæ dicenda utiliter essent, ut Prophetarum modo eos ad pœnitentiam provocent, qui ira Dei flagellantur; quod Neocæsarensis Gregorii opera impletum sapientissime historia novimus, ut illius urbis cives ad Christianam fidem converteret, dira tunc Romanum Imperium affligente ubique pestilentia.

*Primo animi motu omnia excogitare,
atque disponere.*

C A P U T III.

NUllum certe, quod alterum ad Oratoris bonum pertinet, tempus magis aptum sit, quam, cum rerum novitate perculsa, excitataque mens, promptiorem quamdam vim habet, tum in rebus omnibus gignendis, tum facultate dicendi. Haud secus enim causarum Patroni primum sylvam rerum, ac sententiarum comparant, quam forment deinde filo ipso,

D

&

& genere orationis, illuminent verbis, variantque sententiis, cum a Cliente rei aliqujus statum omnino didicerint: quodque divino afflatui tribuebant Philosophi Poetarum furoris, id verius quidem Sacris Oratoribus evenit, qui se ad dicendum commovere maxime sentiunt. Quid enim credere prohibemur magnum esse Dei donum, atque luminum Patris, cum repente mens ipsa movetur, statimque veluti è nubibus coruscantia fulgura, plura irrumpere verba, sententiæ, atque argumenta certatim exire contendunt? nec aliter sane, tum priscis omnium temporum Prophetis, tum vel ipsa Pentecostes die, litterarum rudibus Apostolis contigit, plurimisque deinde Ecclesiæ Patribus, quos extemplo sæpe dixisse eloquentissime audivimus. Haud igitur prætermittat Concionator noster tam opportunum, plurimique faciendum tempus; hæc enim illa hora est, qua & ipsis Ecclesiæ Oratoribus, Dei legatione fungentibus, quid loquantur det Spiritus Sancti gratia; nihilque facilius sit, quam hujusmodi sequentes diligentissime afflatum, ut ea omnia animo occurrant, quæ in unaquaque re dicenda sunt, omnisque concionis ordo, eoque in affectu cum præcipue im-

mo-

moramur, quo in præsentiarum magis erga eos, quibuscum dicendum erit, delectamur, atque movemur; (1) eo, quo fere modo poeticæ compositionis ratio a Muratorio optime traditur.

Causa ergo ab Oratore penitus cognita, & quæ illius maxime propositio; Dei invocet auxilium, ut (2) rectum sermonem, & bene sonantem det in ore ejus; deinde vero, cum rei Gravitatem, vel Utilitatem, vel Jucunditatem, vel Honestatem denique vehementer conceperit, in iis, quibus Auditorum animi hortandi, sive dehortandi erunt, mentis aciem convertat, & quomodo eos argumentis, nec non argumentationis modo docere, itemque refutare; quo delectari magis possint ornatu quodam illustri, idoneoque dicendi genere; quibus demum ea omnia augere, vel e contra minuire, quibusque affectibus moveri; quodnam orationis exordium magis conveniat, quæ perorationis forma, potiorque conclusio; colligatque jam tunc sapienti animo, quæ præstantiores videntur sibi rationes, naturalis scilicet, quæ inesse rebus possunt, nec non moralis Philosophiæ, Theologicasque auctoritates, quæ singilla-

D 2

tim

(1) Perfett. Poet. (2) Heft.

tim cum, ut moris est, totidem in Partes distincta fuerint, iis, quibusdam veluti Demonstrationibus, illam probet, quam sibi assumpserit gravissimam, Populoque jucundam Sententiam. Cum vero non eloquentia ex artificio, sed artificio ex eloquentia natum prodierit, eo statim ordine, qui Oratoris menti optime occurrerit, concionem ipsam instituat, (1) vividam profecto, optimisque illustrata imaginibus, sublimem, nativam simul atque amoris plenam. Illi autem vix consulendum Communia Rhetoricæ Loca opus quidquam erit; copiose enim ex ipsis animi motibus fluunt argumenta, & verba, quæ Etymologia nominis, rei Definitione, Genere, Specie, Causis, Effectibus, contineri solent; Antecedentibus, Concomitantibus, ac Consequentibus, Similibus, Comparatione, Contrariis, Repugnantibus, atque Circumstantibus; quibus, aut quare, aut ubi, aut quando, aut quomodo, aut per quæ, in omnibus requiritur; vel iis, quæ Inartificialia vocat (2) Aristoteles, Lege, Fama, Tabulis, sive cum Deo, hominibusque expresse Conventis, tacitove jure, Juratis etiam verbis, ac Testibus; vel
iis

(1) Murat. Eloq. pop. c. 7. (2) Rhet. l. 1.

iis demum, quæ Exornationis sunt, Personarum genere, patria, auguriis; virtutibus, scientiis, artibus, fortunarumque casibus, mortis genere, causa, funerisque honoribus; nam & mixto hoc orationis genere opus similiter erit. Quibus de rebus se etiam egisse supervacuum (1) Fabio videbatur; fere enim cuique statim apparet quid in vitium quodlibet, quid pro virtute dicendum sit. Quid enim de iis vel Chrysostomus, sive Antiochenum, sive Byzantinum populum alloquuturus? quid apud Livium, cum Italiæ Alpibus insideret Hanibal, deque subiiciendis in conspectu regionibus, ad milites, & Duces concionem haberet? quid apud Quintum Curtium Magnus quoque Alexander cum Darii exercitu jam jam pugnaturus? quid Homerus denique, Virgilius, Deos, Heroas, Duces, Legatosque sæpe loquentes quisque induceret? (2) illa enim implent, quia eloquentes, non adhibent, ut sint eloquentes, quicumque eloquentiæ facultate natura præditi sunt. Hanc ergo (inquit Tullius) (3) vñ intelligo esse in præceptis omnibus, non ut ea sequuti Oratores eloquentiæ lau-

D. 3 dem

(1) l. 5. c. 12. Instit. (2) S. Aug. l. 3. de D. G. c. 3.

(3) De Orat. l. 1. n. 32.

dem sint adepti, sed quæ sua sponte homines eloquentes facerent & quosdam observasse, atque id egisse. Isque maximus denique studiorum fructus, quidni esse debet, & præmium quoddam amplius longi laboris, extempore etiam dicendi facultas, quam qui non erit consequutus, Fabii quidem sententia, civilibus officiis renunciabit, & solum scribendi facultatem ad alia potius convertet. Nec Apelles profecto, nec Parasius, veteribus adeo celebres, cum in tabulis formas, lineis, & ductibus adumbrarent; Phidias marmorea simulacra primum effingeret, quæ Romæ adhuc spectantur; nec Orpheo quisquam similis lyrae cordas pulsando; vel iste musicæ, sculpturæ illi, & picturæ artis rationi plus ut impenderint credendum est, quam iis, quibus pingendo, sculpendoque, & pulsando, motibus excitari sentiebant.

Neque a naturali hujusmodi ingenio longe quidem erit, ut vel Geometricas rationandi regulas haud incongrue sequamur, quibus egregie quidem perficitur, si rem ipsam, orationēque prius instituat Orator, quam deinde proprio sui stylo audientibus expositam habeat; rei scilicet ope Definitionis, Axiomatum, Consecratorum, quæ
varie

varie ex præmissis deducere possumus: cujus rei, quantum cuique secum imprimis fas est, in unoquoque, tum publico, tum familiari sermone, satagere utilissimum foret. Equidem, ut optimo cuicumque Geometræ Viro firmissimum hoc differendi acumen tribuit natura, tam proprium Oratoris, cum Tullio Fabius censebat, ut Scientiæ hujus facultate carere numquam posse docuerit. Nosque, ut Muratorius quoque observavit in suo de (1) Populâ eloquentia libello, ab indoctis quotidie, doctisque simul fieri videmus, qui prout amore, vel odio affecti sunt, acute subtiliter inveniunt, acriter disputant, amplificant, varie ornatæque omnia exaggerant, atque concludunt: quin Barbari ipsi (ita Lisiæ opinionem referens (2) Quintilianus) & servi pro se cum loquuntur, aliquid dicunt simile principio, narrant, probant, refutant, & quod vim epilogi habet, deprecantur. Quis ergo ibit inficias (3) hujus summæ virtutis facillimam esse viam? naturam utique intueamur, hanc sequamur; si quid enim boni in arte invenire est, miramurque omnes, id profecto totum illi tribuendum in primis erit.

D 4

Qui-

(1) In Præf. (2) l. 6. c. 3. (3) Quint.

*Quibus artis regulis inventa ad
docendum perficere.*

C A P U T IV.

QUamvis, ut vera sit, unam esse oportet Eloquentiam; nihilominus quot Oratores, totidem esse concionandi modos fere conspiciamus; non enim eadem est omnibus dicendi vis, atque facultas, (1) natura siquidem nulla est, quæ non habeat in suo genere res quamplures dissimiles inter se, quæ tamen consimili laude dignentur: idque Philosophi non tam animorum virtuti, quam sanguinis, corporisque habitudini, affectionibusque tribuendum non immerito existimant. Quapropter cum multos Græcorum, ac Romanorum Oratores Tullius quoque recenseat, varium ipse nihilominus in unoquoque fuisse eloquentiæ modum advertit: suavitatem Isocrates, (2) subtilitatem Lyfias, acumen Hyperides, sonitum Æschines, vim Demosthenes habuit; quis tamen eorum non egregius? tamen quis cujusquam, nisi sui similis? Gravitationem Africanus, lenitatem Le-

(1) De Orat. lib. 3. n. 7. (2) ibidem.

Lelius, asperitatem Galba, perfluens quidam habet Carbo, & canorum; quis horum non primus illis temporibus fuit? Hæc nos quidem singulis Ecclesiæ Patribus, tanto licet dissentiant illi stylo, ac genere dicendi. Facilitate enim, copia, atque suavitate Cyprianus; abundantia verborum, & quodam cothurni eloquio Ambrosius; subtilitate, atque multitudine argumentorum Augustinus; gravitate, nec non artificio Hieronymus; aurea Tullii dictione Chrysostomus; dicendi magnitudine, ac nobilitate sermonis Leo Magnus; exquisitis morum sententiis, uberrimaque facundia Gregorius itidem Magnus; nativæ, facilisque eloquentiæ fonte Lactantius; in dicendo dulcis, in docendo, ac differendo subtilis Fulgentius. Quamdā ergo, peculiaremque sui artem inducat Orator noster, quæ non servile, sed liberum exhibeat eloquentiæ ingenium, & quo sponte abripi sentiat, illi vel maxime obsequatur eloquii generi, ut ea, quæ dicenda ante repererit, perficere, ornareque admodum possit: est enim, etiamsi minus necessarium, non ille liberale, ut eo quoquomodo utamur.

Idque in primis caveat ille quidem, quod, cum in suadendo, aut dissuadendo nihil sit
opta-

optabilius, quam dignitas; magnifica enim oratione gaudet Populus, gravi Senatus, & brevi, quotidiana familiarique singuli homines; cum dignitate omnia docendo exprimat; singula nempe argumenta, nec non argumentationis modum mirifice ubique tractando, Geometricam & ipse Evidentiam imitatus; quam præcipuum orationis nervum, & robur constituere quidem licet; ut veritatis lumine vi omni percellantur Auditorum mentes. Quam maxime vero poterit civili, (1) & humano ingressu meriri assensum debet; cur enim, nisi forte subita, atque insueta abreptum postulet exordium, torrens, & utique æquabiliter concitata sit dicentis oratio, cū vel præcipue moderationem, rationemque consilia desiderent? nihilque sit in natura rerum omnium, quod se universum profundat, & quod totum repente evolet: sic omnia, quæ fiunt, quæque aguntur accerrime, lenioribus principiis natura ipsa prætexuit. In judiciis quidem, consiliisque secundum conditionem ipsius, quæ tractabitur, rei, accomodanda est dicendi ratio; argumenta, prout causæ cujusque genus postulat, disposita sint: hoc uno excepto, ne

(1) idem l. 5. c. 12.

ne a potentissimis, ad levissima decreascat oratio; sed a minoribus ad majora ordo sumendus; neque omnibus, quæ inventa erunt, argumentis onerandi sunt Auditores, sed iis tantum scelectis, quæ potiora videntur, satisque, cum ad suadendum, tum ad animos commovendos; quæque, vel scripta, vel extemporali oratione tractando, sustinere viribus possit Orator, atque integra mentis acie; breviori autem methodo, & sibi, si extempore præcipue dixerit, nec non Audientium bono; prohibito enim quæ proponenda sunt, atque probanda eliguntur, non Advocatorum lege pro Clientum causis; nam & pauca luculentius explicantur, & facilius animo retinentur.

His itaque dispositis, omnis quidem oratio ut simplex & gravis, & sententiis ornatio, quam verbis ubique incedat, curandum illi potissimum erit. Ea vero cum non tam apud Oratores, quam Grammaticos etiam, ipsiusque (1) Italicæ linguæ clarissimum Bembum, tres ut habeat virtutes necesse prorsus sit, ut emendata scilicet, ut dilucida, ut ornata enuntietur; id equidem usitatis maxime verbis fieri curet Orator,

(1) De Or. l. 3. n. 13.

rator, ac propriè demonstrantibus ea, quæ significari, ac declarari volumus, & ut rerum dicendarum magnitudini plane respondeant; ut eloquentissima Divi Pauli ad Hebræos Epistola, Christianæ Fidei veritatem invictissime suadentis; Tullii etiam pro Lege Manilia de Imperatore eligendo, Quirites adhortantis; ac Philosophiæ Boetio specie tenus objectæ, cum in carcerem conjectum scelestissimis Providentiæ rationibus consolaretur. Itemque sine ambiguo verborum sermone, non nimis longa continuatione verborum, non valde productis iis, quæ similitudinis causa, ex aliis rebus transferuntur, metaphoris nempe, allegoriis, cæterisque. Suis deinde sententiarum figuris, quas Oratoris menti occurrere propius contigerit; Antithesis quæ sunt, Sustainatio, Cõmunicatio, Correctio, Similitudo. Usus vero Exemplorum nulli materiæ magis convenire merito omnes consentiunt, cum plerumque videantur respondere futura præteritis, (1) habeaturque experimentum veluti quoddam rationis testimonium. Quam sapienti porro animi facultate hisce natura verborum, atque sententiarum utatur dicendi figuris, inde

(1) Quintil. l. 3. c. 10.

inde perspicuum maxime est, quod in affectibus vividior appareat Orator, nec languescere orationem finit; clarior secum, & cum Auditoribus perspicaciori utens loquendi modo; fortior illa demum eo quod magis intellectui, & sensibus obvia: non enim fortibus modo, sed fulgentibus armis cum in (1) Cornelii causa præliatus esset Cicero, non judicem solum docendo assequutus est, sed eo usque, ut populus Romanus admirationem suam non tantum acclamatione, sed etiam plausu confiteretur. Quoties autem, & si id aliquando forensis Orator, Antiochiæ Cives, atque Bizantii, Chrysostomi conciones excepisse intelleximus, aliorumque Sanctorum Ecclesiæ Patrum, divina eorum facundia, atque ornatu? ipseque Chrysostomus cum Pauli Apostoli attestate Epistolas legeret, non sibi verba proferri, sed tonitrua audire putabat. Hieronymus vero sermonibus Job, qui & hisce eminent præcipue virtutibus, adeo delectabatur, ut omnes in iis cum Eloquentiæ, tum Dialecticæ leges inesse mirifice admiratus sit. En ergo cur præcæteris maxime arrideant optimorum scripta Auctorum, qui illis Rhetoricæ artis præ-

(1) idem l. 8. c. 6.

præceptis egregie commendantur; displiceant vero qui eloquentiæ spiritu, & nervis deficiunt.

Haud integre tamen, satisque muneri esset, si quis relinqueretur iis, quæ contra afferri possent, dubitationis locus. (1) Confirmatio enim, & Confutatio & natura, & utilitate, & tractatione conjuncta maxime sunt. Quin in reiiciendis totus aliquando esse debet Orator, vel cum Dei justitiam plus æquo verentur Fideles, vel impœnitentiæ mora audacissime peccantes sibi confidunt; vel quodcumque animæ perdendæ discrimen subire illi contemnant: (2) tunc enim neque reprehendi quæ contra dicunt, possunt, nisi tua confirmes, neque ea confirmare, nisi illa reprehendas. Cumque Defensoris veluti partem sustineat Orator, tota ea in Refutatione posita est; (3) nempe ut in judiciis contigit, neget, defendat, transferat, excuset, molliat, avertat, despiciat, derideat, quidquid obii-ci noverit.

De

(1) De Or. l. 2. c. 8. (2) idem.
(1) Quint. l. 5. c. 13.

De iis, quæ ad delectandum pertinent.

C A P U T V.

HÆc pro docendi munere. At magnum quoque studium in delectatione ponendum esse quis nesciat? Si enim pro summa Populi Romani dignitate, gravissimisq. (1) Reipublicæ causis, genus dicendi grandius quoddam, & illustrius adhibendum esse Tullius censebat; majus quidem Christiano Oratori, cum Populo Dei loquuturus sit, summisque de Religionis, atque æternæ salutis rebus. Quem ergo (& in Ecclesia dicentem) stupefacti intuentur auditores? in quem exclamant? quem Deum, ut ita dicam, inter homines putant? (2) eum sane, qui distincte, qui explicate, qui abundanter, qui illuminate, & verbis, & rebus dicit, & ipsa oratione quasi quemdam numerum, versumque conficiunt (singula, quæ digna sunt plane dividendo, propriaque declaratione, atque ornatu Poetarum more perficiendo) id est, quod ornate dicebat magnus eloquentiæ Magister: idemque, omnino præferret divinæ Sapientiæ liber; Proph-

(1) De Or. l. 2. n. 32. (2) Ex l. 3. n. 14.

phetæ similiter cum Populorum vitia arguerent ; Apostolus Paulus ad Romanos maxime Epistola ; cæterosque præter Ecclesiæ Patres, Sanctus quidem Hieronymus, & Leo Magnus excellunt . Præclare ergo patet , quantus in delectatione, sententiarum , schematum , atque verborum usus summopere esse debeat ; (1) quibus quasi luminibus distinguenda , ac frequentanda , sive exornanda omnis oratio . Has inter , ut in adductis exemplis, (2) morum, & vitæ Imitatio, sive Ætopenja , magnum quoddam ornamentum orationis, & aptum ad animos conciliandos vel maxime ; Personarum ficta Inductio, vel Prosopopæja, vita etiam, & sensu omni carentium, gravissimum quoque erit lumen concionis augendæ ; perque Apostrophem , cum ad easdem , vel Superos sermo convertitur ; Descriptio denique, sive Hypotyposis, qua non legi , nec audiri , sed cerni propemodum res videatur ; iis etiam Similitudinem junge , ornat enim valde orationem , facitque sublimem, floridam , jucundam , mirabilem ; quosque altero retulimus capite, verborum tropos, è propria nempe significatione in alienam, cum venustate quadam , ac dignitate ; nec
ver-

(1) lib. 3. n. 52. (2) ex lib. 3.

verborum solummodo, sed orationis etiam, cum in eorum usu aliquanto immoratur; ut enim docendi vim habent, leporem alias habere etiam possunt, ad magnam animorum voluptatem. Quid namque & Moyses, quæ in Exodi, ac Deuteronomii libris referuntur, eloquentissima omnium veteris Testamenti Cantica? quid laudati Job Sermones? vel jucundissima Sponsam inter, & Sponsum Canticorum colloquia? Quid apud ipsum Bembum Heremitæ cujusdam Viri sapientissime de Amore Divino exposita oratio? (1) Præ illis tamen nihil præclarior afferre in concionibus potest Orator, quam si quod in Chrysostomi laudem maxime adducitur, omniumque Ecclesiæ Patrum, oratio omnis divinis Scripturarum verbis, sententiisque frequenter ornetur. Quid enim vel auribus jucundius æternæ Sapientiæ dictis, vel animæ dulcius his super mel, & favum exquisitis omniū eloquiis? vel ad cordis usque interiora, quæ spiritu comedantur, suavius pertinere usquam poterit?

At sicuti rerum omnium varietas, quæ universo, quem oculis cernimus, orbi tantam infert ordinis pulchritudinem; ita

E

Ora-

(1) Aðl. l. 3.

Oratores nostri variam quoque dicendi rationem, ut adhibeant sæpe meminerint, propositumque concionis argumentum interdum vel ex iisdem locis concludere, relinquere alias, alioque transire; (1) sæpe non proponere, ac ratione ipsa afferenda, quid proponendum fuerit declarare; nec iisdem in Confirmatione locis semper expositis; eorundemque verborum sonitu, numero, induc̃ta varietate; nec eadem Confutationis ratio uno, alterove capite adjecta; nec unus disputandi modus; neque idem Schematum usus, vel dicendi stylus; vocis denique nec idem sonus, quo nihil magis tædium Audientibus affert. Hancque eloquentiæ, Tullio ipsi probatam varietatem, recentioribusque (2) Italicæ linguæ Magistris, cum fermocinandi naturæ magis conveniat, liberio-remque præstet homini facultatem; illi solummodo audeant, credo ego reprehendere, qui Scholasticorum potius regulis, rejectaque differendi methodo delectantur, quam nativa Logicæ facundia, nec non Rhetoricorum arte, quibus & magni Viri vel in philosophicis rebus usi maxime sunt. Eos igitur imitari curent quam diligentissime

(1) De Or. l. 2. n. 42. (2) Prose del Bembo.

me, qui tantum certis modis, ac numeris sapienter inflectunt: ii enim (1) aliquid in primis submittunt, modus deinde augetur, extenuatur, inflatur, variatur, distinguitur; cumque ea in oratione tacita quædam exclamatio excitata fuerit, illa quoque in dicendo admiratio, ac summa laus umbram quodammodo habeat, & recessum, quo id magis, quod illuminatum erit, extare, atque eminere videatur. Cumque id ex triplici dicendi stylo confici maxime possit, humili, mediocri, sublimi; ex omnibus quidem D. Pauli Epistolis, una cum Job satis numquam laudandis allocutionibus, vel disputationibus, clarissima omnimodæ eloquentiæ exempla percipere cuique licebit.

Quis in affectibus modus esse debent.

C A P U T VI.

SI quis in affectibus magnus esse debet dicenti usus, is certe in Deliberativi generis oratione; tota enim in commovendis animis concio esse debet, ut in amplectendo gravissimæ rei consilio impellantur maxime Auditores. Jam in docendo quæ dignitas servanda sit, satis diximus superio-

E 2

rio-

(1) Lib. 3. n. 26.

riori capite; idque unum præcipue in Christiano etiam Oratore expetitur, quod Rhetor in suis, ut omni bonitate commendetur, non quid mite solum exhibens, sed humanum, & audientibus amabile, atque jucundum: quod & in Christo Domino, atque æterni Patris Sapientia maxime futurum Isaias aliquando prædixerat; eoque modo non ne a fine usque ad finem attingit illa, fortiter suaviterque cuncta disponens? difficile enim dictu est quantopere conciliet animos hominum comitas, affabilitasque sermonis. Verum cum in exordiendo ea statim habenda cura sit, ut pro reliqua omni oratione optime disponantur Audientium animi; idque, vel ex intimis causæ visceribus, vel a personarum, rei, loci, temporis adductis circumstantiis, vel a simplici nudaque rei expositione, vel a contrariis, vel ab insigni aliqua sententia; gravioribus certe, illustrioribusque figuris tum verborum, tum, quas hic subiicimus, sententiarum, a cōmuni quidem dicendi consuetudine remotis. In argumentis vero exponendis animadvertendum maxime erit, ut quæ præcipua esse possunt, evidentiori quodam loquendi modo, propriisque figuris vi omni, atque ornatu exhibere nitamur. Totus enim

enim desiderabilis erat Canticorum Sponsæ Dilectus, nihilque in eo, quod venustum, optabile præsertim non haberetur; verum tanta oculis ejus suavitas inerat, ut Sponsæ ipsius animum advolare statim ad eum facerent; tanta labiis item dulcedo, ut in favi modum stillantis, verba profferrent, cumque eam alloquerentur, liquefieri animam sentiebat.

Hic porro memoriæ sunt repetenda, quæ alterius capite libri, de Affectuum commotione exposuimus, ne quid in primis omittat Orator, ut vehementi quodam, copiosoque dicendi genere in iis, quæ potiora sunt, vel rei Dignitatem, & amplitudinem ostendat, vel Indignitatem gravioribus, splendidisque verbis, aut rerum enumeratione, aut cæterarum comparatione, ita ut animos feriat, permoveat affectus, sui que in sententiâ abripiat. Meminerit etiam oportet, quod maxima concionandi pars ad movenda sit ad animorum motus, quos jam mente conceperit Orator, pro ut quisque nascetur, vel denuo excitatus fuerit; nunc Amoris, vel Odii plena oratio; verbis, atque sententiis; nunc Desiderii, aut Iræ, Spei, vel Timoris, Gaudii, sive Tristitiæ, Admirationis, Commiserationis, Æmulationis, Vere-

cundiæ, eorumque omnium, quibus incitari umquam contigerit: adeo veluti spiritum omnis concionis, atque animum in affectibus esseprehendimus. Quinctilianus enim fuimet experimento, ac natura ipsa duce illud acceperat, quod in movendis affectibus summa posita esset, ut in primis ipsi moveamur. Nam & luctus, & iræ, & indignationis aliquando ridicula fuerit imitatio (1), si verba, vultumque tantum, non etiam animum accomodemus. At quomodo fiat, ut afficiamur? per eas quidem, inquit, imagines, quibus rerum absentium ita repræsentantur animo, ut eos cernere oculis, ac præsentibus habere videamur. Quodque in somnis, vel cum de præclaro, aut miserando facinore nobiscum cogitamus, usuveneri nonnumquam solet, cur non id facillimum erit, si gravissima cujusque rei bona, aut incomoda, voluptatem, aut turpitudinem, laudem, aut infamiam, præmium, aut pœnam, instantemque necessitatem animo serio expendamus, vivideque fingamus? hæcque quisquam bene cæperit, is in affectibus non potentissimus erit? uti sedens Jeremias, stensque vehementer Jerusalem mala, excidiumque, volvebat; & Moy-
ses

(1) Lib. 6. c. 3.

ses futuras Prævaricantium punitiones antea prævidit; omnesque Prophetæ ex eo etiam nomine dicti, quod utriusque Judæ, atque Israelis Populi mala videntes fuissent. Hincque singularum rerum Illustratio sequetur, quæ & Evidentia dicitur, ut Orator non tam dicere videatur, quam ostendere, sicuti in Prophetis ipsis cernere est; affectus autem non aliter futurus, quam si rebus iisdem revera interesset.

Huic ut satis fiat præclarissimo Oratoris muneri, quædam subiiciunt Rhetores dicendi schemata, quæ in optimis quibusque Auditoribus advertere fuit; quæ quidem, cum una eademque natura nostris quoque inesse Concionatoribus possint, verendum minime erit, ne sua sponte idem & ipsi perficiant. Ea vero sunt, vel una in re Commemoratio, sive Exornatio, & illustris (1) Explanatio, rerumque, quasi sub aspectum gerantur, Subjectio. Dubitatio item quomodo cum Auditoribus sit Oratori dicendum; tum duo illa, quæ maxime ad movendum quoque sunt, Similitudo, & Exemplum; Præteritio, & Reticentia; urgens quæsitæ rei Interrogatio, sibi que de eadem aliquando Responsio; Exclamatio, Epipho-

E 4

ne-

(1) De Or. l. 3. n. 53.

nema, Admiratio, Oratoris Deprecatio; Promissio etiam, Objurgatio; dolensque imminentium malorum Vaticinium, & Minæ. His maxime ornatur divinus plane Psalmorum liber, in iis, quæ mores præcipue respiciunt, variosque Psalmi affectus, casus, opem, & spem, vel denique impiorum pœnas; gemebundi similiter Ezechiæ Regis canticum; Prophetarum Invektivæ; Jeremiæ Threni; Apostoli Paoli ad Corinthios Epistolæ; ut alia mittam insignia utriusque Testamenti loca. His quoque & S. Hieronymi in Vigilantium tractatus; movent denique, ad lacrymas usque cientes & S. Cypriani ad Martyres Litteræ, ejusque ad populum conciones. Homerus autem quantus in affectibus, Priami in oratione, Achilem pro Filio rogantis? Virgilius item Æneæ Matris, cum Jovis opem Filio, Nepoti, Trojanisque imploraret? Jure ergo, meritoque arguuntur illi Oratores, qui generice potius, abstractisque loquendi modis, quam ulla morum, sive rei imitatione dicenda exponunt. Satis minime efficit, neque ut debet, plane dominatur oratio (1), si usque ad aures volet, atque sibi judex, de quibus cognoscit, narra-
ri

(1) Quint. l. 8. c. 3.

ri credit, non exprimi, & oculis mentis ostendi. Quid enim si nullis admotis imaginibus, de inferorum pœnis differat Orator, deque Beatorum gloria, si quæ in Scripturis Sanctis referuntur sententiis, tantummodo proferat, quin ipsis eorundem figuris verborum sensum tribuat, illustret, exornet? languida prorsus erit oratio, nullusque in affectibus ipse erit, qui dicit, quamvis differtissimam habere possit concionem. Ii autem, qui acriter plus æquo declamant, perpetuisque insectationibus suos obruunt Auditores, nos cum Fabio, non orationes modo, sed hystorias etiam ut legant hortamur; invenient enim nec in Consiliis abrupta initia, & concitatus sæpe in judiciis dictum, & verba aptata rebus, in utroque genere, & breviores aliquando causarum orationes, quam sententiarum.

In perorationibus denique, cum ad concionis finem ventum jam fuerit (quæ vel rerum collectione, vel affectibus constat, sed his fere Concionatori nostro opus est) ea omnia, quæ breviter ennumeranda videntur, pondere aliquo dicenda sunt; & aptis excitanda sententiis, & figuris utique varianda, de quibus superius jam di-

E 5

xi-

ximus; itemque, ut totas causæ suæ vires Orator ante oculos ponat, & ea dicat, quibus si Judex, ait Quintilianus, nos vero auditor cum esset, ipse maxime commoveatur: hicque omnes eloquentiæ (1) fontes aperire liceat, magnificis, ornatisque utendum verborum figuris, atque sententiarum. Præclarus fane hic Oratoris labor, sine quo cætera nulla, jejuna, infirma, ingrata sunt. Commovendumque, ut ita dicam Ecclesiæ theatrum, ut ad illum perveniat finem, qui dicit, quo veteres clauderentur Tragediæ: Plaudite; totamque discedens secum afferat orationis victoriam, optatumque dicendi fructum.

*A pronuntiatione omnis perfectio
Orationis.*

C A P U T VII.

VERUM quid hæc omnia prodesse Oratoribus possunt, nisi cum dignitate quadam egregie quoque pronuncient? Actio in dicendo una dominatur, sine hac summus Orator esse in numero nullo potest (2): mediocris hac instructus summos sæpe superare

(1) L. 6. c. 1. (2) De Or. 1. 3. n. 66.

re. Huic primas Demosthenes dedit, secundas, & tertias; ipsoque Demostheni ob id Æschines item palmam concessit; neque enim tam refert qualia sint, quæ intra nos ipsos composuimus, quam quo modo efferantur; nam ita quisque movetur, ut audit loquentem. Jam scimus quod Lystris, præter restitutam claudio cuiquam sanitatem, Paulus (1) & Barnabas Diis quam simillimi habiti fuerint, Mercurio quidem Paulus, quoniam ipse dux erat verbi (iisque) Jovis sacerdos, cum populis tauros, & coronas sacrificare volebat. Divum etiam Basilium, qui Magnus & eloquentiæ laude fuit, Erasmus summopere admiratus est, eo vel maxime, quod simplicem quamdam, nativamque dicendi facultatem, pari cum suavitate, nec non majestate conjugere visus esset, totiusque corporis elegantiam, quæ eousque legentibus placeat, vel cum Auditoribus ipsis eorum vitia vehementius persequitur. Undenam aureum, divinumque nomen (2) sine labe fortitus est Chrysostomus, quam quia in summa eloquentia, summam habeat gratiam, venustatemque dicendi? Unde Zenonis similiter Sanctissimi Veronæ E-

E 6

pif-

(1) Act. c. 14. (2) Suidas, Bern. de Montef. in ejus op. præf.

piscopi, qui tam mite habuit ingenium, & vehemens, tanta erat sermonis suavitas, ut omnes, qui illum adibant, divinum quiddam in eo suspicerent, & quodammodo Deum in homine venerarentur? Illos ergo omnium Concionatorum Principes tum denique imitari facile possumus, si id, quod maxime commendat Fabius, in actione præsertim spectetur decorum: est enim latens quædam in hoc ratio, & innarrabilis, &, ut vere dictum est, caput est (1) artis decere quod facias. Sicut enim si funebres sint conciones, aut consolationis, tristes & submissæ esse debent; in Senatu conservanda auctoritas, in privatis modus, & apud Populum dignitas; ita in laudationibus, gratiarum actione, exortatione, similibusque læta, & magnifica, & sublimis est actio. Deinde vero si iis, quibus incitantur animi, ipseque Orator incitatus antea fuerat, motibus obsequi curemus; nam affectus omnes languescere necesse est, nisi voce, vultu, totius prope habitu corporis inardescant. Quantum enim in actione insit Concionatoris virium, ex ea intelligi potest subita omnium admiratione, cum *Æschines Rhodiis exul*, suavissima, ac maxi-

xi-

(1) l. 11. c. 3.

ma (1) legisset voce, quæ a Demosthene pro Ctesiphonte dicta fuerat, egregiam Orationem; quid enim inquit, magis admiraremini, si illum audissetis, cum actore mutato, tantum moveat oratio? Qui vero præclarum illud naturæ munus assequutus fuit, ut ex tempore quæcumque dicere possit, commonendus maxime erit, ut liberiori quodam modo, ac mentis impetu regantur potius, quæ ipsi dicenda sunt, eoque verborum, ac sententiarum stylo, quem ab eximiis tantum linguæ Cultoribus, atque (2) Magistris præcipuum sibi, nativumque quodammodo adsciverit: si enim plus æquo se se ad orationem sollicitius comparare studuerit, & perturbantur, facilius animi cogitationes, & imminuitur antea conceptus spirituum fervor, & ingenua retardatur facundia.

Cum autem omnes ipsiusmet animi motus, (3) suam quamdam naturam habeant, vultum, ac sonum, & gestum (utar enim Tullianis præceptis), cumque voces primum, ut in fidibus chordæ, ad quemquam tactum respondeant, acuta, gravis, cita, tarda, & magna; Iracundia quidem acutum sibi genus fumere, incitatum, crebro

in-

(1) Val. l. 8. Murator. c. 14. (2) De Or. l. 3. n. 58.

incidens, intermissumque solet; Miseratio, & mæstitia flexibile, plenum interruptum, flexibili voce; Metus demissum, & hæsitans, abjectum; Vis autem contentum, vehemens, imminens, quadam incitatione gravitatis; Voluptas effusum, lene, tenerum, hilaratum, atque remissum; Modestia sine commiseratione, grave quidquam, & uno similique pressu, & sono prolatum. Omnes autem hos motus subsequi debet gestus, non hic verba exprimens scænicus, sed universam rem, & sententiam non demonstratione (1), ut re ipsa factum in re aliqua fuit, sed apta solum significatione declarans. Manus similiter gestu minus arguta, & velox, digitis subsequens verba, parumque in Exordiis expectans; brachium procerius projectum in contentionibus quidem, contractum vero in remissis, quasi quodam telum orationis; item que pedis supplotio, sed in contentionibus ipsis, aut incipiendis, aut finiendis. Oculorum magna sit quoque moderatio, qui toto præcipue dominantur ore, & vultu; oculi enim sunt etiam, quorum tum intentione, tum remissione, tum conjectu, tum humilitate motus animi significamus apte cum

(1) Num. 59.

cum genere ipso orationis. Ad vocis denique usum quod est, ut eam plane obtineamus, nihil est Oratori utilius, quam crebra mutatio, nihil perniciosius, quam effusa, contentior; ejus enim varietas, perque omnes vocis sonos, cursus & se tuebitur, & actioni afferet suavitatem.

En igitur quam probe, & Musicen doceri prius voluerat Quinctilianus, qui Oratoris arte instrui cupiebat. Cum enim duplices habeat numeros musicæ facultas, vocibus quidem, & corpore; hæc omnia illi necessaria esse putabat magnus ille Rhetor, ad gestum unum, alterum ad collocationem verborum, tertium ad flexum vocis; plurimumque valere, ut ad sonus, cantusque concentum, tum ad movendos, tum ad leniendos animos. Porro animadvertere id opus maxime est, quod cum & ipse commotus Orator, gestum ita composuerit, vocemque modulatus fuerit ad summum usque motionis, cum sui, tum Auditorum affectum, haud longius in his immorandum erit; cito enim lacrymæ arcescunt; ideoque affectum frigescere minime patiamur, cumque eousque duxerimus, relinquamus, alioque transitus fiat. Veruntamen

men hæc omnia; ut in pronuntiatione optima sint, divinos plane Viros, Prophetas nempe, Apostolos, nec non Ecclesiæ Patres præ oculis habeat Orator, quorum in exponendo Dei Verbo munere fungitur; vultus gravitatem, totiusque corporis modestiam, dicendi vim, animarum zelum, divinam legationem imitetur. Siquidem & scire interest, maximeque observandum quales ipsi quoque Oratores sint, qua ætate Presbyteri, quo honore, qua dignitate, atque auctoritate debeant videri. Ita quidem fiet, ut ea, quæ utiliter invenerint, sapienter disposuerint, ornaverint, perfecterint, jucunda, dignaque Pronuntiatione tandem adimpleant.

*Affidua optimorum Auctorum lectio
commendatur.*

C A P U T VIII.

U Num est, quod maxime commonendum censuimus, ut optime dicendi facultas comparari ab Oratoribus possit, Imitatio nempe, sive in legendis, qui in hac prope divina arte excelluerunt, sive in exercendis, quæ ab iis ediscere aliquando fue-

fuerit; nam in omnibus fere minus valent præcepta, quam experientia; nihilque rerum ipsa natura voluit magnum cito effici, proposuitque pulcherrimo cuique operi difficultatem, ait Quintilianus, ut plus esset (crediderim ego) iucunditatis in iis, quæ a propriis gignuntur viribus, industria, atquæ labore, quam quæ aliorum veluti dono adipisci videntur. Omnis ergo vel ipsa in primis loquendi elegancia, quamquam expolitur scientia litterarum, tamen augetur legendis Oratoribus, & Poetis; quorum sermone assuefacti qui fuerint, ne cupientes quidem poterunt loqui, nisi illum, quo illi loquuti olim fuere.

A Poetis primum initium sumamus, qui omnium vetustiores fere habiti sunt; est enim finitimus oratori poeta, numeris adstrictior paulo, verborum autem licentia (1) liberior, multis vero ornandi generibus socius, ac pene par. Homerus quidem omnium princeps; ille enim omnibus eloquentiæ partibus exemplum, & initium dedit. Hunc nemo in magnis sublimitate, in parvis (2) proprietate superavit. Idem lætus, ac pressus, iucundus, ac gravis tum copia, tum brevitate mirabilis; nec poeti-

(1) De Or. l. 1. n. 16. (2) Quint. l. 10. c. 1.

tica solum , sed oratoria virtute eminentissimus . Affectus quidem vel illos mites , vel hos concitados , nemo erit tam indoctus , qui non in sua potestate hunc auctorem habuisse fateatur . Apud Latinos vero , alter veluti Homerus , Virgilius habetur , nisi forte & graviori etiam ornatus , atque illustriori dicendi genere , eminetq; in omnibus eloquentiæ laudibus ; quem ex Italicæ linguæ vernaculis quidem Poetis , Torquatus Tassus quammaxime imitatus est .

Inter Oratores vel unus Græcorum Demosthenes nominandus venit , ac sua ipse eloquentia orandi pene lex fuit ; tanta in eo vis , tam densa omnia , ita quibusdam nervis intenta sunt , tam nihil otiosum , is dicendi modus , ut nec quod desit in eo , nec quod redundet invenias . Quantus deinde in dicendo Cicero est ? tam magnus ille quidem , ut Demosthenis vim effinxisse dixeris , copiam Platonis , jucunditatem Isocratis , potiolemque idcirco Græcorum facultatem Romam intulerit . Nam quis docere diligentius , movere vehementius potest ? cui tanta umquam jucunditas affuit ? Jam in omnibus , quæ dicit tanta auctoritas inest , ut dissentire pudeat , nec advoca-

cati studium, sed testis, aut iudicis afferet fidem. Cum interim hæc omnia fluunt illaborata, & illa, qua nihil pulchius audire est, oratio, præfert tamen felicissime facultatem. Huic oratoriæ artis plene similem addito, Torquati ævo, Joannem Casa, qui triplici dicendi genere præsertim excelluit.

Ad Historicos transitus fiat (namque in his conciones, ac sententiæ plerumque suadendi, ac desuadendi funguntur officio) præter eam siquidem, quæ in rebus exponendis laus cuique est, quæquæ Oratori inesse item quandoque opus est, densus nempe, & brevis, & semper instans sibi Thucydides; dulcis, & candidus, & effusus Herodotus; ille concitatis, hic remissis affectibus melior; ille etiam, quod nostrum maxime est, concionibus, ac sermonibus vi omni, hic voluptate præstari sibi videntur. Verum Herodoto æquari T. Livium quis nesciat, cum in narrando miræ jucunditatis, clarissimique candoris, tum in concionibus supra quam enarrari potest, eloquentia? Caii vero Cæsaris tanta vis, id acumen, & concitatio concionibus inest, ut illum eodem animo dixisse, quo bellavit appareat. Quibuscum quotnam similiter conferendi eximie istius modi artis Viri,
quo-

quorum sententiæ recentioribus habentur Historiis, Italiæ, Galliarum, Germaniæ, cæterorumque Europæ Regnorum? vel ex Augusto, sapientissimoque Venetorum Patrum Ordine, extempore etiam mira quidem Doctrinæ, atque facundiæ laude Dicentium; vel ex gravissimis aliorum Principum Advocatis, Legatisque, quorum acta quotidie leguntur? His in prophanis Auctoribus probe expensis, primo quodam hujus Disciplinæ gradu, meliora utique, ac sapientiori eloquentiæ facultate inspicere, admirarique possunt in divinis Scripturarum libris, tum quasdam præsertim Sanctorum Hominum allocutiones, & preces, in Pentateuci, Judicum, Regum, aliorumque Historicorum, præter admirabilem Historiæ quidem stylium; tum in Salomonis concionibus, atque institutionibus; Prophetis, Evangelicis, nec non Apostolorum Litteris. E cœlo enim immissum sapientissimum istud dicendi genus, cuncta humanæ artis præcepta, inaudita quidem excellit, ineffabilique docendi, delectandi, movendique ratione, cum iis comparata, quæ in superioribus exposita nunc usque fuere. Huic demum proxime accedunt excellentiora Sanctorum Patrum scripta, singulari, divinaque facundia exarata

rata, eorum inquam, qui in duobus hisce libellis nominari passim contigit. Ex his igitur quidquid ad sui perfectionem esse cognoverit, animo retineat Orator; & sive scribendum quidquam elegerit, sive extempore dicendum, omnia quidem præ oculis maxime habeat, quæ nunc tradidimus, singulorumq; Auctorum ingenium, & stylum; quodque susceptæ ipsius rei naturam, & genus decere propius intelliget. Ita frequentiori exercitatione similem se illis effingere diligentissime enitatur: optimus enim (1) stylus, & præstantissimus effector, atque Magister; quem satis quidem percipiet, si ea, quæ de Italorum Lingua præclare tradidit laudatus a nobis Petrus Cardinalis Bembus, memoriæ mandaverit. Quo vero se abripi ingenio facilius agnoverit, eo viribus omnibus incumbat exercitatio ipsa: sicut enim adolescentuli Oratoris Magistrum monet Fabius, ut in eo diligenter notet ingenii utique discrimen, & quo natura quemque maxime ferat; duo item sibi vitanda esse: unum ne tentet, quod effici non possit; alterum ne ab eo, quod quis optime facit, in aliud, cui minus est idoneus, transferatur. Si autem liberalior natura-

(1) De Or. l. 1. n. 32.

tura, nulla dicendi virtus ommittenda est, nulla scribendi facultas. Ita fiet, ut & extemporalem orationem facilius proferat, (nam & ita dicere aliquando fiet) meliusque præmeditatam, atque conscriptam. Si subitam enim, & fortuitam commentatio, & cogitatio facile vincit, hanc ipsam profecto assidue diligens scriptura superabit: haud secus quidem, quam terra alte defossa generandis, alendisque feminibus fecundior sit, sic profecto non a summo petitus studiorum fructus, & fudit uberius, & fideliter continet: hac vero sine conscientia, vix quodquam laude dignum explicaturus erit, illaque ipsa extempore dicendi inanem modo loquacitatem dabit, inordinatamque, & verba in labiis nascentia. Ab iis ergo, quos supra laudavimus, aliisque summæ eloquentiæ Viris & verborum sumenda copia est, & varietas figurarum, & componendi, tum ad exemplum virtutum omnium mens ipsa dirigenda est: non solum enim si extempore dicat Concionator noster, sed & si quando in dicendo scriptum attulerit aliquid, cum ab eo (sponte ne, an fortuito) discesserit, reliqua similis oratio consequetur; ut concitato navigio, cum remiges inhibuerunt, retinet tamen ipsa navis

ERRORES.
 Pag. 16. aptitudo
 20. extemporaneis
 61. Ipseque Crisostomus
 Hieronymus vero sermonibus Job
 83. facultatem
 85. eorum

EMENDATIO. 27
 habitudo
 subitis etiam
 Ipseque Hieronymus Job
 vero sermonibus
 facilitatem
 omnia

vis motum, &
impetu, pulsi

Habes igitur
clarissimis, A
ni præcipue
bus de Ecclesi
da maxime
primis Exem
rumque Pat
demum, a c
nativæ pulc
næ; quæque
tibus quoque
litatis habea
no, magno
da tradidim

vis motum, & cursum suum, intermisso impetu, pulsuque remorum.

Habes igitur, optime Lector, ex præclarissimis, Aristotelis, Tulli, Quintilian præcipue monitis, quæ in privatis ædibus de Ecclesiastico Oratore animadvertenda maxime visa sunt; sed & sacrorum in primis Exemplorum auctoritate, Sanctorumque Patrum institutis; atque ex ipsa demum, a qua numquam recedere licuit, nativæ pulcherrimæque eloquentiæ rationæ; quæque nos deinde profutura Incipientibus quoque censuimus; eaque si quid utilitatis habeant, communi Studioforum bono, magno quidem & libenti animo legenda tradidimus, dicamus, offerimus.

Libri secundi Finis.

NOI

NOI RIFORMATORI

Dello Studio di Padova.

A Vendo veduto per la Fede di Revisione, ed Approvazione del P. F. *Vicenzo Maria Panciera* Inquisitor General del Santo Officio di Verona nel Libro Intitolato *Marci Pezzii Veronensis Presbyteri in Ecclesiasticum Oratorem Animadversionum Libri duo*, non v'esser cosa alcuna contro la Santa Fede Cattolica, e parimenti per Attestato del Segretario Nostro, niente contro Principi, e buoni costumi; concediamo Licenza ad *Agostino Carattoni* Stampator di Verona, che possa essere stampato, osservando gli ordini in materia di Stampe, e presentando le solite Copie alle Pubbliche Librerie di Venezia, e di Padova.

Dat. li 18. Maggio 1763.

{ Sebastian Giustinian Ref.
{ Polo Renier Ref.
{

Registrato in Libro a Carte 166 al Num. 830.

Davidde Marchesini Segretario.

110. f.

57

1105.2



